

乾隆杭州府志

杭州府志卷九十五

人物九 隱逸

漢

陸瑋字文該錢唐人漢季納祿歸隱於靈鷲山蓮花峰下

兩浙名  
賢錄

三國吳

諸葛起少篤學潛心著述仕吳爲步兵校尉後隱居山房

宗族蕃盛其山今號爲本山

舊餘杭  
縣志

南北朝

褚伯玉字元璩錢唐人少有隱操寡嗜欲年十八父爲之

婚婦入前門伯玉從後門出遂往剡居瀑布山時人比之  
王仲都在山三十餘年隔絕人物王僧達爲吳郡苦禮致  
之停車信宿交數言而退寧朔將軍邱珍孫與僧達書曰  
褚先生減景雲棲不事王侯自非折節好賢何以致之昔  
文舉棲冶城安道入昌門於茲而三焉夫却粒之士餐霞  
之人不宜久羈望其還策之日暫紆清塵亦願助爲譬說  
僧達答曰褚先生從白雲游舊矣古之逸民或留慮兒女  
或使華陰成市而此子索然惟朋松石介於孤峰絕嶺者  
積數十載近故要其來此冀慰日夜比談討芝桂借訪荔  
蘿若已窺烟液臨滄洲矣君欲見之輒當申譬宋孝建二

年樂詢表薦伯玉不就太祖卽位手詔吳會二郡以禮迎  
遣又辭疾勅於剡白石山立太平館居之年八十六卒

南齊

書本傳

杜京產字景齊錢唐人閉意榮宦頗涉文義專修黃老會  
稽孔覲清剛有峻節一見而爲歎交郡召主簿州辟從事  
稱疾去除奉朝請不建武初徵員外散騎侍郎京產曰  
莊生持釣豈爲白璧所回辭疾不就

南齊書本傳

顧黯字長孺鹽官人有隱操齊永明元年徵爲散騎郎不

就

南齊書顧歡傳

唐

孫路富陽人少有詩名後隱居不仕鄭谷以詩贈之日平生詩譽更誰過歸老東吳命若何知己凋零垂白髮故園寥落近滄波酒醒蘼砌花陰轉病起漁舟鷺跡多深入富春人不見閑門空掩半庭柯

舊浙江通志

宋

林逋字君復錢塘人少孤力學不爲章句性恬淡好古弗趨榮利家貧衣食不足晏如也初放游江淮間久之歸杭結廬西湖之孤山二十年足不及城市真宗賜粟帛詔長吏歲時勞問薛映李及在杭州每造其廬清談終日而去嘗自爲墓於廬側臨終爲詩有茂陵他日求遺稿猶喜會

無封禪書之句既卒仁宗賜謚和靖先生賻粟帛逋善行  
書喜爲詩其詞澄浹峭特多奇句既就橐隨輒棄之曰吾  
方晦迹林壑且不欲以詩名一時况後世乎然好事者往  
往竊記之今所傳尚三百餘篇逋不娶無子教兄子宥登  
進士甲科

宋史本傳

徐爽徽宗朝賜號冲晦先生故廬在城中吳山又嘗居萬

松嶺下

萬歷舊志

徐立之舊名炳學老子法隱于杭西湖之迺峰人呼迺峯  
先生通判都官員外郎蕪爲嘗謂之曰何不仕乎曰若時  
與命會可以佐天子福元元不然悔吝生矣曷若追冥鴻

霧豹與孤雲俱爲敬其言爲著傳

萬歷舊志

高翥字衍孫由餘姚遷杭州居於葛嶺翥生而穎拔九歲能詩及長博極羣書通孫吳兵法憤國家多事疆場日蹙嘗讀劉琨祖逖傳讀已輒北面慟哭欲結客取中原地旣而屢試不售又見朝廷方主和議無恢復志遂絕意功名命所居曰信天惟以詩酒自娛時周方璞劉克莊以詩名重江東翥與兩人遊每以詩酒角勝晚年益放情山水孝宗朝累徵不起賜號菊澗仍手書賚之

仁和縣志

張逢原字淵甫鹽官人九成之後宋末官漳州僉判國亡

不仕句曲外史雨卽其孫也

宋詩紀事

李坦之字道坦錢塘人生宋季早歲入洞霄宮學文于高

士鄧牧深爲所稱許

武林舊事

曹良史字之才號梅南錢塘人咸淳故老與周密遊有詩  
詞三摘俞宗大序曰曹君故宮詞十九首與夫拜景靈游  
湖曲登北城悼今思古所謂哀而不傷怨而不怒忠厚而

惟惻者也

兩湖塵談

梁相字必大杭人爲武林詩友會又與月泉吟社託名爲  
高宇復託爲魏子大同時杭人與月泉吟社者全璧字君  
玉號遜初子自署全泉翁東必曾字孝先號潮原託名陳

柔著

宋詩紀事



元

范思賢錢塘人其先在宋時有爲防禦使用醫小兒得名  
思賢去防禦五世其業益精務利人而不務利於人故名  
愈顯壬辰之寇抄掠市井亟扶其母走匿湖山叢薄棄家  
貲不顧所居城東地平衍有草木禽魚之樂暇日輒賦詩  
鼓琴圖寫山川人物以爲娛或勸之仕曰吾不能隨世俗  
俛仰不願仕也因自稱東臯隱者一時名流多投贈之作

東城

雜記

金應桂字一之能詞章宋季爲縣令入元隱居風篁嶺築  
菴壁山房書學歐陽詢畫學李龍眠左弦右壺中設圖史

古奇器客至撫摩諦玩清談纒纒不休每肩輿入城府幅

巾弊衣望之若神仙然

萬歷錢塘縣志

魏一愚杭人自號青門處士醇懿靚深恒懼外撓閉置一

室中如處女然雖重客至不得面周親謁請或一見卽退

平日危坐閱所蓄書幾萬卷輒味其旨其言行可爲人勸

者疏以示諸子凡積爲若干帙揚維楨爲作墓銘

城東雜記

陳渭叟不知其名杭人讀書學道不混俗不忤物賦詩有

天然趣隱居葛溪上歲一歸名人勝士爭邀致之惟恐其

去也所著有紫陽篇

萬歷錢塘縣志

吾衍字子行杭人意氣簡傲不爲公侯屈色常自比於郭

忠恕居生花坊一小樓客至僅輒止之通姓名使登乃登  
廉訪使徐琰一日來見衍從樓上呼曰此樓何敢當貴人  
登耶願明日謁謝琰聞之笑而去衍亦卒不往生徒從衍  
游者常數十百人衍坐童子地上使冠者分番下授之或  
對賓談噓羣童皆肅容莫敢動衍左目眇又跛右足有晉  
宋間風致畜兩鐵如意日持弄之或倚樓吹洞簫數曲超  
然如忘世者

宋濂撰吾  
子行傳

朱清字元之自幼力學平居以道義自持嘗與葉李同門  
已而李以京學生叩關斥言賈似道得罪投漳州朋從莫  
敢往省清獨往與之訣且爲具凡飲食服用之需俾所親

護送出二千里外及似道敗李免歸清候之江上相見無一語相勞第勉之以風節自終元至元間李居左丞士趨附恐後清顧之漠然若未始有一日之雅者李念清不置數遣人迎致之清卒不往以布衣終所居在邑東山之下鄉人咸稱之曰東山先生後人以清與謝翱配享子陵祠

中

富陽縣志

崔彥暉字遵暉錢塘人號雲林生與王蒙皆吳興趙氏甥善篆隸詞賦畫亦超詣隱居賣藥鹽橋市

成化舊志

吳膚字益思杭州人居崑山工翰墨精篆隸遠近慕之出輒爲好事者邀止止或彌月爲人外和內介所交多達官

絕無求薦意

舊志

徐子貞錢塘人元末隱居城東號匏瓜道人廉介有雅操所居曰蘭菊草堂不蒔他物獨蒔蘭與菊而日循行其間客或見之曰子愛此耶子貞曰吾愛其與吾性合爾屬天

台徐一夔爲之記

城東  
樓記

明

俞和字子中杭人晚年自稱紫芝老人隱居不仕能詩善書翰早年得見趙孟頫運筆之法臨晉唐諸帖甚夥行草逼真文敏好事者得其書每用孟頫識倉卒莫能辨

成化

舊志

高子明本名觀以字行洪武中徵授上元縣教諭靖難兵起以書報兄益菴公曰生不食不義之祿遂挈妻子遁去

不知所終

舊志

孫蔗田包太白皆錢塘人隱於西溪不受徵聘以詩文相

娛樂終其身人日之爲西溪二隱

成化舊志

張翺仁和人精推步占候宣德間潘中丞將往南粵視師翺感知已強與行一日坐帳中見片雲隱隱起離震間謂潘曰事濟矣有頃烈風南來此捷音也已而果然會潘欲疏薦翺逃去易名晦跡以終其身嘗賦詩云有意欲嘗千

日酒無心去傍五侯烟蓋其志也

西湖遊覽志

陸晉字德昭錢塘人隱居甘泉里長年不一至城府以教授生徒爲業德性純良詞翰簡古

成化舊志

劉英字邦彥錢塘人少從學于夏季爵臨川聶大年教授於杭奇之與爲忘年友景泰中郡邑交辟以母老固辭築室於甘泉榜其室曰竹東更號賓山年七十二卒程克勤志其墓以爲孝友似黃山谷高蹈似魏清逸曠達似楊鐵崖英嘗與劉泰輩結社賦詩名動一時

浙江通志

孫適字孟傳博覽羣集有詩名孝親友弟少與翰林王洪善洪家貧親老祿薄不給適周之始終弗渝善行草尤精

于素問鍼灸之術隱居甘泉里

萬歷錢塘縣志

洪鑑字器之號時軒錢塘人鐘之弟少孤貧攻苦力學不  
輟寒暑詩文楷法俱超絕大學士商輅聞其名辟置幕下  
薦授中書舍人欲大用之而鑑性恬淡不樂仕進歸隱西  
溪以圖史消歲月鐘敷歷中外屢遣人招鑑俱不赴及官  
尚書欲薦於朝又力止之且貽書曰兄爲良臣弟爲隱士  
亦各行其志而已集二十卷

浙江通志

王澍字時雨錢塘人性高亢不諧於俗爲詩多獨創語寄  
興山水自號山人貧鮮儻石儲一介不苟取與而口未嘗  
言貧終身無所干客游京師與胡世寧同還至滄州遇賊  
劉六等數萬人圍其城數日不解澍爲州將畫方畧賊遁



世寧大奇之欲薦之朝澍力辭卒以布褐終其身

兩浙名賢錄

施魯仁和人爲荆府長史正德五年荆王疏魯賢請增秩四品劉瑾甚之矯奪魯官勒歸故郡瑾伏誅有詔徵魯復用魯不應召遂終老于家無一畦尺椽之藉東西僑賃不常非其義不受也嘗有書生餽粟三十斛求冒魯族魯曰余惟不爲冒昧之事以至于斯固却之時方絕糧處之宴如也竟藜藿不給而歿

錢塘縣志

潘時雍錢塘人讀書賦詩視富貴覆如也城東二百步有地十餘畝古井一宋輦院故基也荒棄弗治時雍親得之除治一畝爲廬其餘析而爲畦種蔬天稍不雨置桔槔井

上出井水以灌攝飲衣履巡行畦間見菜色青青覆地喜  
日生意若此足矣撮其脆美以供父母其餘賣諸市自號  
曰灌園生崇德貝瓊爲作灌園賦

錢塘縣志

沈仕字懋學侍郎銳少子弱冠有才名一父夢游青門山  
及寤求名山志讀之見秦時故東陵侯邵平隱此嘆曰此  
古隱者居也吾其隱乎遂棄去舉子業芒屨野服自稱青  
門山人以詩歌自娛好古名畫日摩娑久之有得乃援筆  
揮灑風神氣韻絕勝額門遇嘉山水輒流連累旬月與顧  
璘王慎中茅坤岳岱友善嘉靖中客京師諸貴人聞其名  
慕之爭造請待以上客仕夷然不屑也贈遺累千金隨手

散去年七十始返故廬家徒四壁時時資繪畫以自給然  
意所不當者雖重貲不爲動人獲片紙珍若拱璧

仁和縣志

邵穆生字汝宜工部員外郎經邦子爲諸生年未三十遽  
棄舉子業隱靈鷲山中築閣祀許由及唐宋名賢足不入  
城市遇文人墨客鮮不傾倒獨不喜與貴介游又善畫有

求畫者輒不與

仁和縣志

沈祐字天用號紫硤山人海寧人築室紫硤山下顏曰惇  
樸園以棲逸自娛藥欄花塢頗有幽勝時爲古衣冠相羊  
其間關中孫一元同里董溪輩管杖笠相從焉西村集句  
題其居云諸公袞袞登臺省東老雖貧樂有餘嶺樹重遮

千里目故人那惜一行書  
藤花委地香猶在穀雨乾時手  
自鋤閒說小齋多野意  
白雲間釣五溪魚足以想其高致  
矣

硤川志

李元昭字用晦杭州右衛世襲千戶少尚節俠年二十六  
始折節讀書避居靈隱寺之西澗築一室如斗引澗水環  
於席下蒼松翠竹週迴籬壁間人跡既絕惟有泉鳴鳥啼  
與書聲相和荅興至爲韻語直入漢魏之室自號响樓山  
人四方名流韻士過武林訪山人煮茗焚香終日清言不  
倦或一言及塵俗輒起擊石磬數聲以代洗耳當道聞其  
名或鳴騶相過卽鍵戶不納晚結西湖詩社操觚之士以

不與爲恥山人年四十一而隱十年而雲遊八年而還故

山復高臥二十餘年而後歿人以爲蟬蛻云

兩浙名賢錄

袁璉字廷彥新城人博學明經不樂仕進律已端方治家嚴肅聞人有過輒面折之里人有註誤者憚不敢見或比

之彥方云

舊志

周敬字尚禮有學行景泰間嘗舉賢良方正辭不赴篤嗜

吟咏所著唐詩選脉其後裔珽續成之行世

硤川志

劉泰字士亨負奇志特立不羣景泰天順間隱居武林城中蕭然環堵事母至孝所著有菊莊晚香雪餘倡和諸集

錢塘縣志

耶瑛字仁寶正嘉中仁和諸生居草橋門內景隆觀前自  
號草橋子博綜羣書恣意搜討於進取泊如也有愛之者  
曰如後時何瑛曰吾已委身載籍矣當復與諸少年斷斷  
爭甲乙耶

城東雜記

王達字志道號蘭埜錢塘人一足跛家貧居文錦坊兼市  
卜博究子史百家客至輒談古今滾滾不竭

錢塘縣志

張遂辰字卿子號西農少穎異於書無所不窺工爲詩以  
國子生游金陵時名大起見賞於董其昌諸公明末潛名  
里巷爲醫自給能起人死人爭迎致之卜築東城詩格益  
澄澹孤峭多自得之語在西泠流孤外可自名家每于歲

關勉誠子息云家足過年之用座無寒士之求不惟有愧  
本心抑且無別庸俗又嘗述其祖龍墩公貧止一布袍除

日逢急者卽解贈之清門世德可以激薄停澆矣

城東雜記

莫璠字仲璵錢塘人號橘隱晚號櫟壽老人隱居西湖與

劉蔣莊爲詩酒友嘗作讀史詩義氣橫發音節悲壯

武林耆舊

傳

沈繼震字子起錢塘人少質直父置書膝上教之繼震跪  
而受教及長周規折矩不踰尺寸爲諸生四十年非試于  
有司不公謁修脯外不妄受一錢病妻弱女四壁蕭然力  
學著書尤長于春秋與朱白樓稷相頡頏窮老無子寢疾

猶吟咏不輟

舊志

陸瀚字少微號雪酣居杭北郭之青莎里好讀書嗜酒耽  
畫每月率以半月自放於酒半月作畫以應人之求畫人  
物好作山巖野服仕女不爲燕瘦自具韻度山水蒼寒濃  
古深林大澤森然動魄湖墅忠天廟畫壁瀚遺筆也多名  
人題咏流傳至高麗亦有寄題畫壁詩歿於崇禎丙子時  
年四十有八

武林道古錄

邵泰清字以規仁和人舉崇禎癸酉鄉試屏跡靈鷲之呼

猿洞

城東雜記

鄭鉉字元子錢塘諸生崇禎中四方文社最盛而杭有讀



書社以文章氣節相期張岐然江浩虞宗攻馮棕及鉉皆與焉當時稱岐然力學浩潔清宗攻孝友棕深沈而鉉卓犖嘗與同社流連西湖步入深林月下泛小舟論古今各持意見不下鬪聲沸水蕩舟沾服

思舊錄

汪颯字魏美仁和人少孤貧與兄澄弟澐各行相勗奉寡母至孝崇禎己卯舉於鄉奉母避兵天台還居湖上時湖上有三高士皆舉人不脫公車者颯爲其一監司嘗遇之僧舍問汪孝廉何在颯應聲曰適在此今去矣監司載酒湖船請以世外相見其二人相與抗禮颯獨不至已而知在孤山泛船從之颯竟排牆遁去所居敗書數帙或鍵戶

出不返黃宗羲過訪灑送至清波門不入郭舊志江通志

徐之瑞字蘭生臨安人崇禎丙子舉人熟精文選其五言

古致紛披近體效韓冬郎九極綺麗靜志居詩話與祝淵陸培

汪灑定交願生死不相易培死之瑞乃與汪灑約處窮山

中不至城市徐蘭生傳

馮延年字千秋秀水祭酒夢禎之孫祭酒娶于武林沈氏

愛西湖之勝築快雪堂湖上千秋因入籍錢塘中崇禎已

卯副榜貢入太學歸隱秋月巷城東襟記

沈宗塙字以同號定山仁和人性至孝居母喪毀瘠嘔血

杖而後起崇禎癸未成進士魏藻德招之仕語不合策蹇

徑歸

吳農祥  
就正編

張岐然字秀初錢塘人少孤力學虞淳熙以女字之結讀  
書社幾盡一鄉之秀讀書嚴駁異同刻意於名物象數嘗  
與魏學濂黃宗羲取餘杭竹管肉好均者截爲十二律及  
四清聲吹之以定黃鐘於易詩春秋皆有論著後寄踪僧  
寮不入城市

南雷  
文定

江浩字道菴錢塘諸生讀書舉大要不屑事章句同社諸  
子皆推重之後隱于方外究心禪宗

蜀山  
紀聞

夏基字樂只號菴人隱居湖上與毛先舒陳延會諸老皆  
友善著有西湖遊覽志可補田志之缺

武林耆  
舊續集

王至健原字時行生有異稟年十三作新荷出水賦纏纏數千言立就祖風噩大奇之決其必能與宗然終不肯一應童子試方明季流賊縱橫每自歎曰食人之食不能分人之憂雖死有餘憾不如自食猶可苟活也因更字曰時貞取固守之義終身未嘗一出門限外

錢塘縣志

許令瑜字元忠相卿曾孫崇正癸未進士釋褐仙遊知縣上佐軍輸下恤民隱實意將之以時艱不展其蘊棄官遁歸隱居翠薄山結亭於山之半寢食其中不與人世通聲問嘗有盜入室令瑜曰恨無長物相畀倚枕吟七言一詩謝之其逸致如此

海寧縣志

國朝

陸圻字麗京號講山仁和人少穎異讀書過目不忘七歲  
卽能詩長負盛名吳越之士爭歸之輒相見恨晚事親曲  
盡意旨病則割股以進久而知醫治病多竒效親旣沒乃  
棄家遠遊或云入武當山爲道士或云爲僧天台人莫得  
而踪跡之也

武林耆  
舊續集

王洲翁昌化人好讀書放浪山水間興至輒吟吟已輒飲  
著有集自題曰愛吾廬稿或曰縣西洲頭人故號洲翁亡

其名

昌化  
縣志

戴一美字中含休寧人居杭州不輕與人交接嘗棲居十

八年不下梯工詩善書詩燬於火有石刻千文及墨蹟藏

于家

成城  
記事

景星杓字菊公仁和人好蒔菊耽吟咏不與聞戶外事明  
末有楊體元者知名士也流寓杭州固窮不悔卒後柩久

未葬星杓爲卜地葬之

桑調元  
撰傳



杭州府志卷九十六

人物十 方技

南北朝

徐熙錢塘人濮陽太守好黃老隱秦望山有道士過飲留一瓠瓠與之曰君子孫宜以道術救世當得二千石熙開之乃扁鵲鏡經一卷因精心學之遂名振海內

南史張融傳

徐秋夫熙子彌工醫術仕至射陽令嘗夜聞鬼呻聲甚悽愴秋夫問何須荅言姓某家在東陽患腰痛死雖爲鬼痛猶難忍請療之秋夫曰云何厝法鬼請爲芻人按孔穴針之秋夫如言爲灸四處又針肩井三處設祭埋之明日見



一人謝忽然不見當世服其通靈

南史

徐道度叔嚮皆秋夫子能精其業道度有脚疾不能行宋文帝令乘小輿入殿爲諸皇子療疾無不驗位蘭陵太守

宋文帝云天下有五絕而皆出錢塘謂杜道鞠彈棋范悅詩褚欣遠棋書褚允奕徐道度療疾也

南史

徐文伯道度子字德秀亦精其業兼有學行倜儻不屈意于公卿不以醫自業宋孝武路太后病衆醫不識文伯診之曰此石搏小腸耳爲水劑消石湯病卽愈除鄱陽王常侍遺以千金旬日恩意隆重明帝宮人患腰痛牽心每至輒氣欲絕衆醫以爲肉癥文伯曰此髮癥以油投之卽吐

得物如髮稍引之長三尺頭已成蛇能動挂門上適盡一

髮而已病都差

南史

徐嗣伯叔嚮子字叔紹有孝行善清言位正員郎諸府佐  
彌爲臨川王映所重時直閣將軍房伯玉服五石散十許  
劑無益更患冷夏日嘗複衣嗣伯診之曰卿伏熱須以水  
發之非冬月不可至十一月冰雪大盛令二人夾捉伯玉  
解衣坐石取冷水從頭澆之盡二十斛伯玉口噤氣絕家  
人啼哭請止嗣伯遣人執杖防閣敢有諫者撻之又盡水  
百斛伯玉始能動背上彭彭有氣餓而起坐曰熱不可忍  
冷飲嗣伯以水與之一飲一升病都差自爾恒發熱冬月

猶單裋衫體更肥壯嘗有姬人患滯冷積年不差嗣伯曰此尸注也取死人枕煮服之乃愈秣陵人張景年十五腹脹面黃醫不能療嗣伯曰此石虬爾極難療當死人枕煮以湯投之得大利并虬蟲頭堅如石五升病卽差沈僧翼患眼痛多見鬼物嗣伯曰邪氣入肝覓死人枕煮服之竟可埋枕于故處又愈王晏問之曰三病不同皆用死人枕而俱差何也答曰尸注者鬼氣伏而未起故令人沈滯得死人枕投之魂氣飛越不得復附體故尸注可差石虬者久虬也醫療旣辨虬中轉堅藥不能遣須鬼物驅之然後可散夫邪氣入肝故眼痛而見魍魎須邪物鈎之氣因枕

去故令埋于塚間也又春出南籬閒戲聞簷屋中有呻聲嗣伯曰此病甚重更二日不療必死乃往視見一老姥稱體痛而處處有黹黑嗣伯還煮斗餘湯送令服之痛愈甚跳投床者無數須臾所黹處皆拔出釘長寸許以膏塗諸瘡口三日而復云此名釘疽也

南史

徐之才雄子幼儻發善醫術兼有機辯少解天文圖讖之學有患脚跟腫痛諸醫不能識才曰蛤精疾也由乘船入海垂脚水中所致之才爲剖得蛤子二大如榆莢之才術最高時被詔命齊武成酒色過度恍忽不恒病發自云初見空中有五色物稍近變成一美人去地數丈亭亭而立

之才曰此色慾多大虛所致卽處湯方服一劑便覺稍遠  
又服還變成五色物數劑後疾竟愈帝每發動輒遣騎追  
之針藥所加應時取效入秋武成小定更不發動和士開  
欲依次轉進以之才爲兗州刺史及十月帝又病作語士  
開曰浪用之才外任使我辛苦其月八日敕驛追之才帝  
以十日崩之才到已無及矣

浙江  
通志

吳越國

羅塞翁錢塘令隱之子爲吳中從事善畫羊隱以詩名于  
時而塞翁獨寓意于丹青亦詞人墨客之所致思也

宣和  
畫譜

宋

郭昭乾字汝瑞祥符初由汴徙杭州多隱德好施予有異人乞齋善待之遺牡丹三朶覆几上而去花上書婦人症十三方試之奇驗郭氏醫名自昭乾始三傳至曾孫時義字仲敬建炎元年孟太后疾召醫時義以母馮氏應召依丹方治之脫然愈封安國夫人賜田賜葬賜藥碾如鐵舟

然又賜第海昌賜姓至今海昌稱趙郭里

錢塘縣志

錢乙字仲陽吳越王俶支屬父穎善醫喜游東之海上不返乙方三歲母前死姑嫁呂氏哀而收養之長誨之醫告以家世卽泣請往跡尋凡八九反積數歲遂迎父以歸時已三十年矣鄉人賦詩咏之乙始以顯顯方著名至京師

視長公主女疾投翰林醫學皇子疾瘵癰乙進黃土湯而  
愈神宗召問黃土所以治症狀對曰以土勝水水得其平  
則風自止帝悅擢太醫丞賜金紫由是公卿宗戚家延致  
無虛日廣親宗子病診之曰此可勿藥而愈其幼在旁指  
之曰此且暴疾驚人後二日過午可無恙其家恚不答明  
日幼果發癰甚急召乙治之二日愈問其故曰火色直視  
心與肝俱受邪過午者所用時當更也王子病嘔泄他醫  
與剛劑加喘焉乙曰此是本中熱脾且傷奈何復燥之將  
不得前後洩與之石膏湯而效孕婦病醫言胎且墮乙曰  
娠者五藏傳養率六旬乃更誠能候其月偏補之何必墮

已而母子皆得全又乳嬾因悸而病旣愈目張不得瞑乙  
煮郁李酒飲之使醉卽愈所以然者目系內連肝膽恐則  
氣結膽衝不下郁李能去結隨酒入膽結去膽下則目能  
瞑矣乙本有羸疾每自以意治之而復甚嘆曰此所謂周  
痺也入臟者死吾其已夫旣而曰吾能移之使在末因自  
製藥日夜飲之左手足忽孿不能用喜曰可矣使人登東  
山得茯苓大如斗以法啖之盡由是雖偏廢而風骨悍堅  
如全人以病免歸不復出乙爲方不名一師卒與法會尤  
邃本草諸書辨正缺誤或得異藥問之必爲言生出本末  
物色名號差別之詳退而考之皆合

宋史方  
技傳



靳儔其先本三晉人儔在北宋時居東京之顯仁坊隱居市藥每日設漿于肆以濟行者宣和間有二道者日飲于靳氏靳氏事之歲餘不懈因曰吾試若耳若長者子孫當有厚報因書數語授之言訖不見視其所授則祕方也試之小兒奇驗高宗南渡扈蹕至武林遂世爲太醫數傳至從謙爲御直翰林醫官賜敕特晉三階出內府百子圖賜之命以所居巷爲百子圖巷儔之後有起蛟著本草會編起蛟之子鴻緒著內經纂要

錢塘縣志

李信本汴人小兒醫也官院判從高宗南渡遂家于杭之義和坊高宗危疾詔信入侍因年耄賜安車入禁時號李

車兒信八世孫瑤于明永樂時亦召入禁官御醫始移居

北郭

錢塘縣志

陳沂其先汴人唐乾寧時有仕良者以醫名于時奉敕修聖惠方官藥局奉御數傳至沂益能闡先世之祕建炎中扈蹕而南遂爲錢塘人沂嘗診治宮妃危疾有奇效賜御前羅扇凡宮中有疾欲不時召之者聽持扇入禁中金吾闈侍皆不得沮止仕至翰林金紫良醫子孫標木扇象之

至今稱陳木扇

兩浙名賢錄

邢氏忘其名醫術甚奇時韓侂胄知閣門事將出使俾之診脈曰和平無可言所可憂者夫人耳知閣回輒曰恐未

必相見也韓妻本無疾怪其妄誕不倫然私憂之洎出疆甫數月而其妻果報卒朱勝非子婦偶小疾視之邢曰小疾耳不藥亦愈然不宜孕孕則必死其家以爲狂言後一歲朱婦得男其家方有抱孫之喜未彌月而婦疾作急遣召之堅不肯來曰去歲已言之無可療之理越宿而婦卒

萬歷舊志

嵇清字仁伯世傳秘術善療金瘡骨損父初自汴扈蹕南渡時戎馬蹂躪全活甚衆金人入寇帥臣請俱值兵潰因失所在事聞命清攝職年未冠早諳先業宮中有患折肱者醫莫能措清爲整治完好壽王躬親騎射時有誤損應

期而瘳中外益重之先是大江以南良醫固鮮正骨一科尤所罕覩清旣著名日有扶疾就視者續斷起廢輒見奇效其後有勝者明宣宗時以雜科顯掌院事卒于官至今

稱稽接骨焉

兩浙名賢錄

李立之臨安人在宋以小兒醫擅名一時有嬰兒忽患瘖立之令以衾裹小兒乘高投之地小兒不覺大驚遂發聲能言問之曰此乳搐心也非藥石所能療

兩浙名賢錄

羅知悌字子敬以醫侍穆陵甚見寵厚丹溪朱彥修志醫徧歷江湖不遇明者還至武林遇知悌候門下三載始得見知悌愛其誠盡以其術授之彥修遂以醫名東南知悌

能詞章善揮翰貧病無告子之藥無不愈者仍贍以調理

之資

成化舊志

嚴防禦杭州人孝宗常患痢衆醫不效德壽憂之過宮俱見小藥肆遣中使詢之曰汝能治痢否對曰專科遂宣至問得病之由語以食湖蟹多故診脈曰此冷痢也其法用新采藕節細研以熱酒調服如其法杵細酒調數服卽愈德壽大喜就以杵藥金杵曰賜之至今呼爲金杵曰嚴防

禦家

養病漫筆

張介以命術遊公卿間居錢塘西湖上常自京師南歸士

大夫率爲詩贈之

中山詩話

韓慥紹興末賣卜于臨安之三橋多奇中庚辰春曾侍郎  
仲躬呂太史伯恭至其肆則先一人在焉問其姓宗子也  
次第推命首言趙可至郡守却多貴子不達者亦卿郎次  
及曾則曰命甚佳有家世有文學有政事亦有官職只欠  
一事終身無科第次至呂問何幹至此呂曰赴試曰去年  
不合發解今安得省試曰赴詞科曰却是詞科人但不在  
今年今年詞科則有人矣後三年兩試皆得之且不失甲  
科復叩其何所至沉吟久之曰名滿天下可惜無福已而

其言皆驗

癸辛雜識

夏巨源精于卜筮居臨安每來卜者一卦率五百錢紹興

三年洪禹之自贛倅受代還朝其子价侍行既至點檢文書遺其一遣僕還家訪尋終不能自釋乃自詣夏肆夏書紙上曰事在千里外繼書一食字一堯字合之則饒字也曰文書見在係一多口人收得而鴛鴦爲看守無足憂也既而僕從饒州至持所遺返蓋向者併行李時忘在外小妾福安見之收寘鴛篋內既悟鴛鴦看守之語而福字有口田字又四口所謂多口人也

夷堅志

戴厚甫錢塘人精遁甲其母寢處樓上一夕忽見紅光貫室開幃視之乃一美女立榻前自拔金釵遺母既而無所見母以語戴答曰適祭遁神遂致此耳遁神見某必不久

矣逾數月而卒

輟耕錄

耿聽聲亡其名家候潮門內以能聽聲知吉凶貴賤故名其嗅衣物亦如之德壽聞其名取宮人扇百餘雜以上及中宮所御令小黃門持叩之耿嗅中宮扇曰此聖人也然有陰氣至上扇乃呼萬歲上奇之呼入北宮又取妃嬪珠冠十數示之至一冠奏曰此有尸氣時張貴妃薨此其故物也夏震微時嘗爲殿帥餽酒于耿耿聞其聲知其必貴遂以女妻其子時郭棣爲殿帥耿謁之曰君部中有三節度使叩爲何人則曰周虎彭輅夏震也虎輅時爲將官獨震方爲帳前佩印官郭曰周彭或未可知震安得遽爾乎



已而悉驗

癸辛雜識

孫守榮富陽人生七歲病暫遇異人授以風角鳥占之術其法以音律推五數播五行凡問者一語頃輒知休咎守榮既悟異人授以鐵笛遂去不復見守榮因號富春子吹笛市中市人初不識也然其術率驗寶慶間遊吳興聞譙樓鼓角聲驚曰土人當有典郡者適見王元春卽賀之曰作鄉郡者必君也越兩日王果典郡自是富春子之名大顯貴人爭延致之淮南帥李曾伯薦諸朝既至謁丞相史嵩之閣者以晝寢辭守榮曰丞相方釣魚園池何得云爾閣者驚異入白丞相丞相一見頗喜之自是數出人相府

一日庭鵲噪令占之曰來日晡時當有寶物至明日李全果以玉柱斧爲貢嵩之又嘗得李全檄藏袖中詢其事守榮曰此李全作假布囊三十萬爾剝封果如其說

宋史方技傳

孫景璠杭州水軍篆千字文爲五十餘體太平興國八年以獻太宗善之詔去黥文隸御書院以宰相宋琪請授國

子書學博士

宣和畫譜

吳說字傳朋師禮子廣陵王令之甥也令有高名爲王安石所重女嫁師禮而生說善楷書九里松字其所書也高宗嘗欲易之御書十數卒莫能及命以金飾之

西湖志

馬和之錢塘人紹興中登第善人物山水筆法飄逸務去

華藻自成一家高孝兩朝深重其畫毛詩三百篇每篇俱

畫一圖官至工部侍郎

萬歷舊志

其後有顧興裔者專師和之

但設色不逮耳

西湖遊覽志

林生杭士作江湖景蘆雁水禽氣格清絕南唐無此畫可

並徐熙在艾宣張涇寶覺之右人罕得之

米芾畫史

劉松年錢塘人居清波門紹熙畫院學士師張敦禮工畫

人物山水神氣精妙過于師寧宗朝進耕織圖稱旨賜金

帶院人中絕品也

畫髓元銓

林椿錢塘人工花草翎毛瓜果皆師法趙昌傅色輕淡生

意藹然淳熙中待詔畫院賜金帶

佩文齋書畫譜

馬遠號欽山其先河中人世以畫名後居錢塘光寧朝待  
詔畫師李唐布景齊整工山水人物花鳥種種臻妙獨步  
畫院其樹多斜科偃蹇至今園丁結法猶稱馬遠云兄遠  
亦善畫子麟能世家學然不逮父遠愛其子多于已畫上  
題麟字蓋欲其章也其時有蘇顯祖葉肖巖亦師馬遠蘇  
筆法稍弱俗呼爲沒興馬遠葉小景酷似而大幅不如也

西湖遊  
覽記

夏珪字禹玉錢塘人寧宗朝待詔賜金帶畫人物醞釀墨  
色如傅粉之色筆法蒼老墨汁淋漓雪景全學范寬院中  
人畫山水自李唐以下無出其右者

佩文齋書  
畫譜

王輝錢塘人理度朝畫院祇候工人物山水釋道與李嵩  
同家間用左手描寫人稱爲左手王輝時有白良玉何青  
年方椿年亦工釋道椿年又喜著色山水其後有周鼎臣  
者亦師輝

西湖遊覽志

李從訓待詔宣和紹興二朝賜金帶畫道釋人物花鳥特

精妙高出流輩

萬歷錢塘縣志

李嵩錢塘人李從訓養子工人物山水道釋又長于界畫  
光寧理三期待詔畫院其徒有馬永忠豐興祖顧師顏皆  
傳其法嵩年老倦作多令永忠代筆其孫李章者亦善畫

西湖遊覽志

朱懷瑾錢塘人寶祐間畫院待詔工山水人物樹木窠石

作雪景用墨全師夏珪

畫史會要

樓觀錢塘人工花鳥人物山水學馬遠筆法咸淳年畫院

祇候

畫髓元銓

馬宋英溫州人徙錢塘至淨慈寺寫古松于壁題云磨盡

一錠兩錠墨掃出千年萬年樹月明烏鵲悞飛來踏枝不

着空飛去了大全賞其書畫急命索之人息其能閔不令

出卒不遇遂成詩識

舊志

元

宋會之杭州人元時名醫其治水蠱法以乾絲瓜一枚去

皮剪碎入巴豆十四粒同炒以巴豆黃爲度去巴豆用絲瓜炒陳倉米如絲瓜之多少米黃色去絲瓜研之爲末和清水爲丸桐子大每服百丸皆愈其言曰巴豆逐水者也絲瓜象人脈絡也去而不用藉其氣以引之也米投胃氣

也鮮于樞所記如此

嘉靖浙  
江通志

沈復東錢塘人幼穎悟好讀書既長受醫術于海昌慧力寺之忠上人取黃帝岐伯所論及張仲景劉守真李東垣諸家書窮日夜讀之遂造其間奧忠亦無以過之于是無貴賤貧富有疾者輒造請焉起人于阡危者數矣然一以利天下爲心其施甚博而取于人者甚廉

浙江  
通志

陸華之錢塘人以賣卜馳名且通文學縉紳多與之友

西湖

遊覽志

王淵字若水號澹軒杭人幼習丹青趙孟頫多得其所指授故所畫無一筆院體山水師郭熙花鳥師黃荃人物師唐人而一一精妙尤精水墨花鳥竹石尤當代絕藝也

畫史

會要

沈麟字秋澗杭人畫山水師郭熙兼能寫貌樹梢鷹爪松葉攢針山多盤聳石作雲皴見者稱其得郭家之風度

西湖

遊覽志

陳琳字仲美杭人父珏宋寶祐中待詔工設色而琳與趙



孟頫遊故山水人物花鳥俱逼古人南渡以來無及之者

高歷錢

塘縣志

王繹字思善自號癡絕生其先睦人居杭之新門篤志好學雅有才思年十二三已能丹青亦解寫真李孝先俾作

一圓光小像面部僅大如錢而宛然無毫髮異後得吳中

顧周道緒言益造精微是故于小像特妙非惟貌人之形

似且得人之神氣

較耕錄

韓文錢塘人善補硯雖百碎者但不失原屑補之若無損者亦能修古銅器居蒲橋夜宿一石櫃中與人言無尊卑

皆爾汝得錢卽付酒家一舉而盡

清賞錄

李和錢塘人精于碑刻凡博古之家或有贗本求一印識雖邀之酒食惠以錢物終毅然却之其印文李和鑒定石

刻印

山居新語

明

陶華字尚文餘杭人治病有奇效一人因食羊肉涉水結于胃中其門人請曰此病下之不能吐之不出當用何法陶曰宜食砒一錢門人未信試以他藥不效卒依華語一服而吐遂愈陶曰羊肉能解砒毒羊肉得砒則吐砒得羊肉則不能殺人凡鄉人抱奇疾他醫不能治者華輒能愈之後來省治傷寒一服卽愈名動一時然非重賂莫能致

論者以是少之所著有傷寒六書

舊志

吳綬錢塘人著傷寒蘊要全書發明五運六氣畫圖立說  
究極淵微以名醫徵至京師仕太醫院院判有病傷寒者  
諸醫議用承氣湯邀綬入視曰將戰汗矣非下症也當俟  
之頃刻果戰汗而解

兩湖名賢錄

葛林字茂林工小兒科名聞京師成化時命內臣徐來杭  
驛致之充太醫院官時宣宗方在嬰稚皇太后保護甚周  
每召供御一夕宣宗癘疾作中外惶怖夜分召林一七而  
安明日使與宴有白金彩幣之賜汪比部有子痘已愈醫  
皆以爲無恙林視之曰災其在彌月乎至期而其子寔然

汪置酒高會若以誦林者林視其子之足底有泡結癩膚  
內曰吁其百日哉及期果暴歿汪問其故林曰是疾初發  
自腎而不能暢是以言其必死既而流注于足故發之緩  
耳林貌清癯骨削而目睛炯然其視疾得其聲色洞若燭  
照既而切脈以決生死莫一遁也善制方劑其應若響官

至太醫院院判

舊志

孫鈍字公銳嘗遇異人授却老之術年踰九十肌若處子  
精于醫四方叩門求治者無虛日有皇甫泰者與之齊名

時稱孫皇云

錢塘縣志

翁禹訓字汝守幼穎異父念其尪弱令治醫家言取黃帝

以下書及諸禁方讀之務研其奧有奇驗寒暑不乘輿張  
蓋獲賢資隨以濟人及抵家待以舉火者又滿座終不吝  
施與也四十失明處一室訓子孫多貴顯

錢塘縣志

諸餘齡號雲泉善書奕博通醫家言而多新得四方爭致  
之晚隱靈鷲言人死期俱不爽每語客曰我巾車馳城中  
起人于死者何得身為死人馳喪車出城乎當終于此耳  
與徐鏜輩諸名醫為天醫社子夢環隆慶辛未進士

錢塘縣志

盧復字不遠習岐黃兼通大乘與子之願善療奇疾凡尸  
歷迴風投劑無不立愈復嘗著本草博議蓄疑未決後見  
之願私論奇之曰此子當自成一家言遂授使續之之願

折衷先說廣所未備編輯成書卽世所稱本草乘雅者是也生平著述甚富蓋托醫以隱者歟

錢塘縣志

陸彬字嗣文忠宣公後裔自平湖徙錢塘彬少敏達精扁鵲倉公之術明熹宗時隨大父京師以精醫授聖濟殿侍直太醫院吏目旋奉旨教習醫學懷宗屢召入視皇后皇太子疾徹御饌賜之陞上林苑監右監丞掌南院加光祿

寺卿

錢塘縣志

嚴觀性聰穎不拘古方頗有膽畧用薑汁製黑附有難之曰附子性熱奈何復益以薑嚴曰附子性大熱而有毒用之取其性悍而行藥甚速若製以童便則緩矣緩則非其

治也吾今佐以生薑之辛而去其毒是以用獲奇效人稱  
之曰嚴附子弟泰繼出精于方脉治傷寒多奇效爲時所

推

仁和  
縣志

葉文齡字德徵幼業儒不遂去學醫禮部屢試優等例授  
冠帶供職于聖濟殿陞太醫院吏目甲午召診保和有功  
陞御醫忽被宣召御書忠愛額于堂庚子再召陞院判後

因母老乞終養遂致仕

嘉靖仁  
和縣志

吳恕字如心號蒙齋仁和人精于醫道嘗謂傷寒專門者  
世推張仲景其著傷寒論旨意幽深一時莫窺其要乃約  
爲律賦以發隱復纂指掌圖以開示初學故世之業醫者

往往宗之

成化舊志

錢益字孟謙其先汴人後徙杭之錢塘世業顯顯常懸一金錢于門以故凡求治小兒者必曰金錢錢氏云益性警敏早事舉子業遭家中落乃復事醫而顯顯術益臻其妙成化乙巳被召入太醫院陞御醫致仕歸錢塘常奉詔校

正袖珍等方考據精當凡經其指授者率爲良醫

錢塘縣志

王賜爵字丹宇先世爲宋御醫高宗時以方術奏積授官世以醫顯賜爵性至孝嘗爲父祈禱白嶽時嚴寒行至河西橋有老人坐橋下衣襤褸方嘯歌獨酌呼爵共飲盤餐畧盡惟餘青荷如初出水爵心異之老人曰予與子有夙



因故得遇此期三年重來可一晤語爵如期往老人出方書命曰以此救世可也歸爲人治疾惟望色聽聲或以病

狀相語藥至病痊年七十餘匡坐而逝

餘杭縣志

俞橋海寧人少業儒兼精醫嘉靖間以名醫徵入京初授太醫院吏目陞院判橋于醫書無所不究又博詢故老得河間潔古東垣未刻諸稿及古今諸家授受良方晨夜抄錄斟酌損益處方治病無不奇應居京師耻事權貴貧寒之家有延請者盡心治之不責其報故醫名日盛而家用不給士大夫多雅重之

寧志備考

嚴元字宗仁餘杭人少業儒不售從父耕謁選京師屬有

詔選醫士元故精岐黃家言就試禮部隸太醫院嘉靖中  
預修袖珍諸方錄賜銀幣甚渥上幸承天命元扈從常宣  
召診視及視東宮後宮疾輒效賜金綺至撤御前酒饌以  
優寵之秩滿授御醫會司藥署員缺旨特用元事親以孝  
稱其爲醫熟察標本陰陽脉絡皆極洞暢以子大紀貴封

部郎贈方伯

兩浙名  
賢錄

王尚居儀鳳場口少習外科事母以孝聞母病往浦江求  
醫遇異人曰我能爲子醫延至家備極恭敬異人熟視之  
曰子能孝母又天真不鑿可以傳道吾以術授汝與汝約  
無巧索人財無稽留人疾無緩視孤貧無急趨勢利苟負

吾約災且隨之尚受教因過山中指道傍一草示之曰以此配方書治人傷可死中回生也如言治之遂著神效凡跌壓折傷者卽氣絕齒閉在三日內以箸啓齒灌之藥下喉無不立生或腦裂額破則搏腦敷藥越百日無所損間有腹剖腸出則浣腸納腹中用桑皮綫縫合迄無恙造門丐藥者率以先後爲序不問貧富是以人咸感悅居恒患

瘁疾邑中稱爲王瘁順治初以疾卒法失傳

富陽縣志

王允曙其先有復者爲宋名醫蘇文忠公顏其亭曰種德贈以詩世傳至允曙術益工明天啓間召入京師除院判旋以父病告歸尤善療金瘡折傷有中矢貫兩耳者允曙

爲塗藥得不死有腹爲牛角觸裂腸盡出爲納腸敷藥卒

無恙人謂鵲陀再世云

錢塘縣志

姚應鳳字繼元錢塘人少樸魯年十三入大滌山採藥遇老嫗提筐中青精子使食之自是穎悟夜經東新橋有大木橫道跨之過俄見童子叱大木使起雷電驟作龍翔空中應鳳立視色不變心神頓開嘗詣齊雲山逢老人病不能行求附載應鳳獨行無車徒乃負之至山顛老人懷中出小槎導之飲應鳳覺其異取飲之遂能洞見肺腑老人曰子當以醫名世應鳳拜受教旋失老人所在應鳳旣屢有異徵自言能治奇疾時人未之深信也崇正時巡撫喻

思恂駐溫州拒海賊劉香毒發背間劇甚召應鳳至剖腐  
肉二大器傳以丹藥越二日癰平開轅門坐受香降巡撫  
深德之由是名著嚴州施盛宇頭痛不可忍應鳳乃割額  
探首骨出瘀血數升頓除鄭孝廉尚友痛流注應鳳視之  
曰氣從下洩乃取藥作糜周身封以敗楮隙肩井穴治之  
遂愈某叟患脹滿諸醫多云隔症應鳳曰此肺癰耳取一  
大盂水向病者頂上傾之病者陡驚急舉刀直刺心瀉膿  
血數碗而愈人問之應鳳曰人心下垂水潑而驚驚則心  
系提吾刀可入也沈氏嗽不休應鳳曰肺潰至第二葉然  
尚可生先投洗肺湯已令食豬肺數十片遂愈有人身患

痛左臂似有係之者應鳳曰君食肉中鼠毒左臂生鼠懸  
刀擬之有鼠墜地而逸其療毒奇中多類此應鳳好爲德

于鄉遇兵荒多所賑恤官太醫院判卒祀鄉賢

吳農祥  
就正編

朱養心餘姚人徙于杭幼入山得方書專門外科手到疾

愈迄今子孫皆世其業

家傳

陳岳山仁和人居竹竿巷以星命爲業得異人授以天文  
之術言事歷歷有驗一日與鄰老遊郊外欲回陳強之弗  
得云爾去必遭官杖其人不信偶冲郡守節級果遭杖又  
常見郭顏色門首豎幡欲爲醮事陳曰此日不宜作醮道  
士云文奏已定不可改矣竟于是日行之後果遭官事岳

山足跋性傲雖富貴人亦慢薄之終無求于人以貧死

武林

紀事

張崙字景高仁和人五歲喪明十三受易凡卜筮星歷諸書入耳蘊心能了大義每論人祿命壽夭窮達利鈍歷有奇驗宸濠構逆浙鎮守太監畢真謀內應人情洶洶布政何天衢稽疑于崙筮得解之彖崙歛楨賀曰無虞也渠魁將授首矣何內應之有不旬日江西捷音果至

萬歷舊志

僧如蘭富陽人善相術于謙少時嘗博戲市中如蘭見之

曰少年何不自愛異時濟世才也

錢塘縣志

趙良字松泉汝談之後久困諸生棄去遊京師士大夫多

禮之嘉靖中大學士徐階與御史鄒應龍持正議除權族  
良往來二公間有密語雖至親不能與者間呼良決之良  
善卜所言悉驗于是二公欲薦用貴顯之良辭不就以例  
授江南巡檢又不肯久居也會孫最昕皆進士

餘杭縣志

程良玉字元如本新安人居于杭五齡瞽目父惜其慧令  
習醫又去而學卜從茗上張星元受業盡得秘奧星元自  
以爲不及也東陽張國維命卜終身良玉舉手曰公忠臣  
也卦爲君子謀曰滅頂之凶不可咎也國維卒殉難復社  
之訟淨慈僧爲奸人耳目將起大獄機械成矣試以意占  
而謬云家宅良玉曰此非一人事也卦不云乎君子得與



小人剝廬若僧也安問家宅繇凶事不可行也改之則無咎矣其人懼而止金華許都反巡按御史左光先命筮之曰吉不戰而克吉孰大焉我強彼伏已繫其首歲且更始克之在正月四日馘之其在十日也已而果然良玉善推易理發言依于忠孝性警敏一聞客語知其姓氏居處終身不忘

吳農祥  
就正編

吳東升杭州前衛百戶善楷書杭城十門并各公署皆其書額淨慈寺壁書南屏二大字結構尤佳憲宗時負重名

兩浙名  
賢錄

顧履中字雲樓工署書篆隸諸體萬歷初營建皇極殿成

大學士張居正薦題綽楔筆法稱旨擢內閣中書賜名復

中

海寧  
縣志

湯煥字堯文號鄰初仁和人嘉靖乙卯舉人工書神宗時  
召爲翰林院待詔嘗御製序其草韻辨體煥當國家承平  
之時崇尚風雅便殿平臺時復宣召宮花金楮絡繹道塗  
杭人以爲榮晚而家居嘗從其孫遊巷陌間歲除見書春  
聯者輒借筆書之其人怒煥謂之曰第言湯鄰初書價當  
十倍其人跪謝爲縱筆盡書之煥以資格僅爲贛州郡丞  
有能名告歸後家無餘金嘗遣女無他裝以十箱贈皆貯  
以所手書曰寄語郎君爾翁遺嫁心力盡矣歿後祀于學

宮同郡許光祚字靈長得煥書法時人號曰湯許以萬歷

庚子舉于鄉知太平縣亦奇士

舊志

范叔明號元白錢塘人善繪事以右肱病廢專事左筆畫

多宗董北苑黃大癡墨法纖細更工花鳥蘭竹偶一濡毫

便成名筆

畫髓  
元詮

戴進字文進號靜庵又稱玉泉山人錢塘人臨摹精妙爲

畫流第一

佩文齋書  
畫譜

進山水得諸家之妙大率模擬李唐

馬遠居多神像人物走獸花果俱極精緻而神像之威儀

鬼怪之勇猛衣紋設色重輕純熟亦不下于唐宋先賢也

至于臨仿先賢而無欸者法眼視之莫辨真僞此能品也

圖繪寶鑑續纂

俞恩字天錫錢塘人號江村居士善畫人物花鳥性疎散  
描染稜時輒復中止故所傳不多子舜臣字治甫喜觀長  
流疊巘號海峯子工山水人物著色翎毛花卉尤精絕

兩浙名賢錄

藍瑛字田叔錢塘人少穎異八歲嘗從人廳事醮灰畫地  
作山川雲物林麓峯巒咫尺有萬里之勢及治經生家言  
指河圖洛書曰古人未有書先有圖圖何必不名家遂留  
意繪事皴染皆合古法其細描宮樣則界畫衣褶色色飛  
動突過宋畫苑諸人

舊浙江通志

姜師周字周臣錢塘人善畫山水學宋石門下筆老健陰  
晴濃淡烟雲縹緲又善牡丹鈎勒設色俱佳周臣嘗遊京  
師時關仲通以畫名師事焉與同郡藍瑛各拈正練數丈  
相戒止寫獨樹高柯勿用竹石映帶嘗寫梧桐落筆數葉  
得秋風晨露之致見者以爲神品爲人深沉知大體魏忠  
賢私人崔某欲得師周屏障爲稱觴以他友名代求師周  
怒擲之地後以子圖南貴贈侍御

圖繪  
寶鑑

王謙字牧之錢塘人號冰壺道人善寫梅花嘗與夏太常  
仲昭合寫梅竹一幅題曰歲寒二雅牧之之梅落筆雄逸  
有蒼龍出岫之勢仲昭之竹以綠渲染就如七尺琅玕與

蓋珠相映真傑作也牧之起家儒士隆平侯張祐喜寫梅

聘爲西席侯畫法多其指授子應奇亦善梅花能世其傳

無聲

詩史

顧炳字黯然錢塘人萬歷間以善畫供事內殿就所聞見  
繪爲畫譜自晉唐以來罔不傳摹存其梗槩鎔今鑄古能

集大成

無聲  
詩史

石銳字以明錢塘人畫得盛子昭筆法金碧山水界畫樓

臺及人物皆傳色溫潤

無聲  
詩史

裴夷武林人善寫竹程太史愛之贈以詩云萬紫千紅不  
奈看有名誰可結詩壇惟餘筆下脩脩竹解與幽人閱歲

寒

無聲  
詩史

項承恩字龍叔新安人爲杭州府學生屢上不第遂隱西湖岳墳仿石田畫蒼莽淋漓直得子久家法

佩文齋書畫譜

沈宣字明德號兩山仁和人由歲貢官安慶府學訓導工古文詞尤長于詩下筆立就有驚人語晚年好畫山水人

爭藏之

沈石田集

祝海鶴錢塘人宏治間與惠祥高騰等造琴擅名一時人

多珍之

琴

葉折手天順間杭人失其名左臂病風善奕棋高者下者俱可與之對局終則必勝也四方能棋之士過杭與之奕

終無一人能過者世稱葉折手

七修類稿

陸壘山杭人杭城假山稱江北陳家第一許銀家第二今皆廢矣獨洪靜夫家者最盛皆工人陸氏所壘也堆塚峯巒拗折澗壑絕有天巧號陸壘山張靖之嘗贈以詩云出屋泉聲入戶山絕塵風致巧機關三峯景出虛無裏九仞功成指顧閒靈鷲飛來羣玉塚峨眉截斷落星間方洲歲

晚平沙路今日溪山送客還

西湖遊覽志

何有一名復有坊郭里人少讀書見康節梅花數悅之玩月餘忽有悟一日老鴉鳴占之曰主夫妻相爭見血已而更靜時僕夫與其妻鬪于室急往禁之已扑頰額流血因



名曰老鴉數所占無不立應四明桂茂之館于周美家督  
學使者業行檄試寧波矣桂書去字令有占之曰字雖云  
去而直畫下筆俱有鈎搭勿去也桂不之信又書壬字曰  
督學去任矣三日內卽有徵至三日果然叩其故曰壬上  
一撇是撇却士子去也士字三畫故三日陸文宰應試請  
卜書當字曰高等首食廩矣當字上絕爲賞頭下爲田字  
諸生以廩爲田也諸決事率皆類此

富陽縣志

潘爛頭元妙觀道士能運掌心雷以筆濡頭上膿水作符  
治祟疾奇效相傳潘能役神鬼嘗踞厠戲名王靈官至神  
怒其不恭以火筆點頭故爛云

舊志

都某字修之少解音律善鼓琴然性簡抗意所不欲雖王公貴戚不爲操曲嘗于良夜月明焚香煮芥間作一二弄其聲閒淡蕭疎使聽者翛然自遠

舊志

國朝

張永祚字景韶通曉星學甫離懷抱卽夜從母仰瞻五緯長益究參占天年近三十督學王蘭生稔其學錄爲諸生總督嵇曾筠求能通知星象者試永祚策立成數千言大器之薦于

朝授欽天監博士一再引

見占侯悉驗

詔刊經史校勘二十二史天文律歷兩志書成將議敘遽乞假歸取平昔所著天象源委足成之卒于竹竿巷萬氏清白堂寓齋有女能傳其學嫁諸生沈度字天橋亦善推步法其書在度家

張博士傳

潘楫字頌甫號鄧林少以孝弟聞樂道不仕賣藥都市中以韓伯休目之受業數百輩治疾皆有奇效

仁和縣志

吳嗣昌字懋先仁和人世業醫總督趙廷臣遭危疾嗣昌獨排衆論投以冰水立愈後醫居河渚著傷寒正宗醫學

慧業等書行世

舊浙江通志

閔自成字思樓錢塘人性孝友幼失恃父喪明出入扶掖

不離撫孤姪二人如已子精內外醫求治者日不暇給遇貧乏不受值且診視必先往曰倘後彼將慚慚益其病矣年七十一夢吏持牒迎主老鹽倉社遂坐逝

舊浙江通志

沈好問字裕生少孤力學世業小兒醫至好司益精尤善治痘症閔氏女年八歲出痘甚惡好問曰諸醫云何對曰死症不必藥矣好問曰兒一身死痘然有一生痘尙可生令取五年抱雛母雞用藥入雞腹外以糯蒸雞令食盡視之右手寸關脈痘二粒明豔如珠女果生江氏子一歲痘止三顆見額上耳後唇傍好問曰兒豈部位心腎脾三經逆傳土尅水水尅火宜攻不宜補攻則毒散補則臟腑相

戒治至十四日痘明潤將成矣好問曰以石膏治之恐胃  
土傷腎水俗醫憐兒小謬投以參好問見之驚曰服參耶  
不能過二十一日矣兒卒死其洞見多類此

錢塘  
縣志

金塗珂字潤寰會祖麗泉爲海內知名士張冢宰瀚江學  
士鐸皆出其門仕至工部右侍郎塗珂少有神童之目比  
長遵母命業醫雖讀書萬卷不拾糟粕極難險症從容處  
之嘗云古之名醫者曰和曰緩倉遠奚爲耶無富貴貧賤  
悉以平等心治之若鰥寡孤獨不惟不取值輒有貽贈杭  
城內外所全活者甚衆

錢塘  
縣志

張所望字衛生溧陽人徙錢塘性敏悟工岐黃術兼以瘍

醫知名理安寺一僧患水疔走黃絕水穀者已三日衆莫能治延所望入視曰毒已入內須下針因向瘡頂刺入寸餘始聞痛聲曰生矣隨以膏塗之復投丹藥數粒拔其疔根堅黑如鐵遂愈一婦產一子忽叫痛欲絕舉家驚愕莫措所望診之曰腹內尙存一子未下投一丹而子下母遂

甦其活人多此類

錢塘縣志

馬更生字端雲錢塘人少學醫于婦翁周業已成未敢試周好奕一日有貴人疾革請周值方奕令更生往一劑而愈由是名大起嘗出見暴死人曰此可活人多不信啟其齒灌藥而甦或望色聽聲預決人生死至期輒驗

舊浙江通志

李无垢錢塘人明末爲南京太醫院醫士順治中携藥囊

至梅會里榜其門曰總理內外大小十三科方脉里中醫

嫉其大言謗者蠡起移寓萍橋僧舍朱彝尊仿之无垢方

注本草經多發新義彝尊妻馮病熱七日不汗後七日又

不汗踰二旬勢轉劇諸醫皆云傷寒不可治乃要无垢登

閣診視笑曰君夫人所居閣四面俱木圍之木生火觸暑

脉伏爾亟以甘瓜井水投之可不藥愈從其言越宿而舖

糜再宿主中饋如故无垢客死所注書無存

曝書亭集

徐希賢字士三仁和諸生生平敦孝友謹言行好施與研

究軒岐之術以醫藥活人甚夥常遊豫章謁張真人遇隆

於龍虎山禱雨立應年七十一端坐而逝家傳

吳應本字潢序仁和諸生食貧嗜古中年卽不踏省門工

八法尤以左筆擅場同邑俞光耀字翼文孝友醇謹工書

暮年亦工左筆

舊仁和縣志

朱因號泊翁錢塘人官至太守書似沈石田善墨荷題畫

詩別具風致

武林耆舊續集

查璇繼字寅工號介菴孤貧績學兼工篆籀嘗著印譜自

大小二篆上逮三代鼎彝銘志源流正變靡不悉具

海寧州志

顧卍字竺公一字山臣施萬字大千別號汗漫子兩人皆

以詩名家又善篆隸摹印在何震陳士衡上

舊志



賴以邠字水西號迂翁少爲仁和諸生負雋才中年棄去  
布衣野服蕭然物外詩詞書畫無不擅長尤工于寫蘭雨  
晴風雪各盡其態好事家爭奉縑粟相易藏若拱壁

武林  
耆舊

績  
集

劉度字叔憲錢塘人藍瑛弟子也深得瑛筆意後更變其  
法師大小李將軍界畫樓臺約縮人物細入毛髮而形像  
宛然然亦間及他家沒後雖寸縑片楮人皆奉以爲寶

錢塘

縣  
志

謝彬字文侯上虞東村人隨父遊學至杭遂家焉少年從  
莆田曾波臣遊授寫真法凝眸熟視得其意態所在濡毫

點次眉目如生精彩殊勝彬身不滿五尺矍然而清目如  
點漆兼善畫山水及作漁家圖清超絕塵迥與時別人多  
珍之子廷璋能得其傳

仁和縣志

魯得之字孔孫號千巖錢塘人僑寓嘉興善書工墨竹發  
竿爽勁掃葉清利由仲圭而追蹤文蘇矣晚年右臂不仁  
以左手畫風竹尤有致繼起者惟仁和諸昇字日如號曦  
菴筆亦勁利然失之勻師昇法者錢塘俞俊字秀登頗能  
出藍新城有陳一元者亦善竹有名

畫徵錄

顧知字爾昭號埜魚錢塘人善山水鉤斫拂曳如作草書  
縱恣橫逸不拘繩墨所做米氏雲山小幅筆情墨趣瀟灑

天真氣味極清古梅竹亦佳妙

畫徵錄

楊芝錢塘人善人物仙佛鬼判筆力雄健縱恣不假思慮  
援筆立成特長于尋丈大體愈大愈妙西湖天竺寺壁觀  
自在像是其筆也第不喜作小幅故流傳絕少同里有徐  
人龍者亦長仙佛鬼判力雖遜于楊然一時罕匹其後有  
顧升董旭並善畫人物升字隅東生而掌有文成升字遂

名升

畫徵錄

周兼海寧人工畫士女衣紋清古設色淡雅布置俱有來

歷

畫徵錄

王樹穀字原豐號鹿公仁和人題其所居曰粟園工人物

筆法出于陳洪綬而得其清穩所謂善學柳下惠也衣紋

秀勁設色古雅一時工人物者無能出其右

續畫  
徵錄

周珽字無瑕號青羊居硤川工吟咏善畫以葡萄擅名蜿

蜒生動尺寸有尋丈之勢晚著廣孝錄諸書

舊海寧  
縣志

朱雝模字臯亭號南廬錢塘人善山水年九十餘猶不倦

點染同里太醫院吏目朱方華號雷田亦以率筆寫山水

各自標其逸趣

續畫  
徵錄

賀金昆錢塘人武解元善人物花草

續畫  
徵錄

朱鈴字正夫號鹿門幼嗜畫每遇專門委贄師焉及長遨

遊江湖凡遇險怪高深之處恒加搜索而于雲林雪竹徑

卉巖花樵夫釣叟稍有關於景趣者必凝神默識積習久之得意忘象每一揮毫手神直追吳戴臨古畫徃徃能亂

真焉

仁和縣志

丁錫字佑之號西鳴其先西域人卜居仁和百福菴南自幼慧巧喜爲畫遇紙輒揮灑初不經意旣成遠出羣工上始學吳進後無常師翎毛花鳥無不盡善而尤精于山水

臨摹古畫皆宛然神似云

仁和縣志

林元字蓮山號阮林海寧人父世俊官永昌府元葬兩世于黃鶴峯下以墓近杭州遷家會城詩清深有理致拔奇于韓性通悅不問家人生產事惟素難向所熟習非甚危

急之症不肯妄詣人時俗工林列元所切究者皆唐以前之書處方量藥爲羣醫所側目兼工寫生山水花鳥皆入

逸品

林阮林墓碣

周霽字止願居昌化西北鄉之趨嶺古貌古心絕去塵俗好聚書卽陰陽醫卜諸家亦靡不通曉晚喜作畫多自寫

其蕭疎閒淡之意

昌化縣志

徐遠字星友錢塘人工書畫尤長於弈黃龍士以弈擅長遠晚出與之齊名游京師朱邸多招致之高麗使者自矜其弈無偶遠與對局連勝之由是名益著晚歸卜居鐵冶橫評輯諸家之弈有兼山堂弈譜行世兼工象戲有棄馬

十八局鈔譜好事者藏之

家傳

施紹闇字襄夏號定菴太學生工詩善琴尤長於弈徧遊列郡海內推國碁第一品客揚州著弈理指歸按五行而布勢循八卦以分門自一隅至全局繫以短歌淺深各得著績編爲入門妙訣知弈者以爲古之國手皆遜施一籌也同里范西屏亦善弈以道勁勝亦國手也與紹闇齊名

而少遜焉

海寧州志